



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

## **Sumáriu Mensál:**

### **Atividade Parlamentu Nasionál**

**Novembru 2020**

Rua Beco Lakateu, Aldeia Manu fuik,  
Suku Colmera, Administrativu Vera Cruz  
Dili Timor Leste  
PoBox: 275

Telefone: 3323883 | 77257466

[www.jsmp.tl](http://www.jsmp.tl)

[info@jsmp.tl](mailto:info@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

## Tabela Konteúdu

<b>Introdusaun .....</b>	<b>3</b>
<b>Reuniaun Plenária .....</b>	<b>3</b>
<b>Reuniuan Komisaun A .....</b>	<b>5</b>
<b>1. Audénsia pública kona-ba OJE 2021 .....</b>	<b>5</b>
a) Audénsia ho Xefi Kaza Sivíl Prezidénsia Repúblika .....	5
a) Audénsia ho Gabinete Primeiru Ministru, Gabinete Apoiu Sosiedade Sivil, UPMA Museu Resistênsia Timorense, AMRT, Sentru Nasionál CHEGA, I.P, INAP no IGE.....	6
b) Audénsia ho Ministru Prezidénsia Konsellu Ministru .....	7
c) Audénsia ho Ministériu Asuntu Parlamentár no Komunikasaun Sosiál .....	7
d) Audénsia ho Ministériu Justisa .....	8
e) Audénsia ho Tribunál .....	8
f) Audénsia ho Ministériu Públiku (MP) .....	9
g) Audénsia ho Ministériu Administrasaun Estatál (MAE) .....	9
h) Audénsia ho Komisaun Anti Korrupsaun (KAK) .....	10
i) Audénsia ho Provedoria Direitu Umanu no Justisa (PDHJ) .....	10
j) Audénsia ho Komisaun Funsau Públika (KFP) .....	11
k) Audénsia Komisaun A ho Komisaun Nasionál ba Eleisaun (CNE) .....	11
l) Audénsia ho Polisia Siéntifika Ivestigasaun Kriminál (PSIK).....	12
<b>2) Reuniaun Komisaun A iha 16 Novembru 2020 .....</b>	<b>13</b>
<b>3) Reuniaun komisaun A Parlmantu Nasionál iha 17 Novembru 2020 .....</b>	<b>14</b>
<b>4) Audénsia Pública Komisaun A PN kona-ba Lei Podér Lokál no Desentralizasaun Administrativa ho Lei Eleitorál Munisipál.....</b>	<b>15</b>
a) Audénsia Komisaun A iha munisípiu Bobonaro .....	15
b) Audénsia Komisaun A iha Ermera.....	17
<b>Konkluzau no rekomendasaun.....</b>	<b>20</b>

## **Introdusaun**

JSMP monitoriza diaramente atividade Parlamentu Nasionál nian. Atividade prinsipál sira Parlamentu Nasionál nian mak reuniaun plenária no Komisaun Espesializada Permanente sira-nian no fiskalizaun ba programa no atividade Governu nian.

Reuniaun plenária hala'o iha Segunda-feira no Tersa-feira, reuniaun Komisaun sira-nian hala'o iha Kuarta-feira no Kinta-feira no fiskalizaun hala'o iha Sesta-feira. Reuniaun plenária, aleinde plenária normál, iha mós plenária extraordinária. Reuniaun plenária extraordinária hala'o ses husi oráriu reuniaun plenária normál nian.

Parlamentu Nasionál iha fulan Novembru nian laran funsiona normalmente no fokus ba Orsamentu Jerál Estadu (OJE) 2021 nian. Parlamentu Nasionál sei nafatin hasoru dezafiu boot ida mak posizaun polítika bankada opozisaun CNRT ne'ebé la rekoñese legalidade estrutura Meza Parlamentu Nasionál, nune'e mós Governu VIII hodi la partisipa ativamente iha debate no aprovasaun ba OJE 2021 nian.

Atividade Parlamentu Nasionál iha fulan Novembru nia laran domina ho audénsia públika Komisaun Espesializada Permanente sira ho entidade sira Estadu nia ba proposta OJE 2021 no audénsia públika Komisaun A nian kona-ba ezbosu Lei Podér Lokál no Desentralizaun Administrativa ho Lei Eleitorál Munisipál. Aleinde Komisaun A, Komisaun C Parlamentu Nasionál mós iha fulan Novembru halo semináriu kona-ba panorama orsamentál ba OJE 2020.

## **Reuniaun Plenária**

### **a) Plenária 23 Novembru 2020**

Ajenda reuniaun plenaria 23 nian mak hanesan tuir mai ne'e:

- Apresentasaun pedidu justifikasaun falta husi deputadu Antoninho Bianco, Jose Virgilio R. Ferreira, Duarte Nunes no Deputadu Patrocino Fernandes dos Reis.
- Diskusan no votasaun ba votu Pesar ba matebian Eis deputadu Armando Jose Duardo da Silva.
- Diskusaun no vota saudasaun ba Deputadu Duarte Pacheco ne'ebé eleitu ba Assembleia Repúblika Portugues hansen Presidente Uniaun Parlamentar.

- Apresisaun foun ba Dekretu Parlamentu Nasionál nu.19/V- Lei Protesaun Sivil.

### ***Votu Pesar***

Rezultadu Diskusan no votasaun ba votu Pesar ba matebian Eis deputadu Armando Jose Duardo da Silva husi Partidu Liberal, aprovalu ho votu sira afavor 53, kontra 0 no abestein 0.

### ***Vota saudasaun ba Deputadu Duarte Pacheco***

Rezultadu Diskusaun no votasaun ba votu saudasaun hodi kongratula Deputadu Duarte Pacheco ne'ebé eleitu ba Assembleia Repúblika Portugues hanesan Prezidente Uniaun Parlamentar, ho votu afavor 53, kontra 0 no abestein 0.

### ***Apresisaun foun ba Dekretu Parlamentu Nasionál Nú.19/V- Lei Protesaun Sivil***

Iha justifikasaun Sekretáriu Estadu Protesaun Sivil nian konsira katak prezensa lei ne'e importante atu fó kbiit ba Serbisu Protesaun Siviíl hodi halo atuasaun ba situasaun sira iha tempu estadu enfreta kalamidade sira ligadu ho sunu rai, rai halai, inundasaun no sira seluktan ne'ebé persiza tebes hetan atendumtu no protesaun husi estadu atu fó apoiu liuhusi Sekretaria Estadu Protesaun Siviíl.

Tuir Sekretáriu Estadu ne'e, kleur tebes ona husi Protesaun Sivil atu iha lei ne'e tanba kompara ho nasaun seluk importante tebes atu bele asegura sidadaun sira-nia direitu ba hetan protesaun liuhusi lei ne'ebé própriu no adekuadu.

Rezultadu diskusaun no votasaun ba apresiasaun foun ba Dekretu Parlamentu Nasionál Nu.19/V kona-ba Lei Protesaun Sivil, aprovalu ho votu unanimidade ne'ebé votu afavor 55, kontra 0, kontra 0 no abestein 0.

Iha deklarasaun politika bankada sira nian, bankada sira konsidera prezensa lei refere importante atu atua situasaun nasaun nian bainhira enfreta situasaun kalamidade sira hanesan moras surtu sira, mudansa klimátika no femomena sira ligadu ho dezatre naturais sira ne'ebé iha lei ne'e preve atu halo atuasaun.

Deputadu sira konsidera mós katak Timor-Leste nu'udar rejiaun ida ne'ebé iha pontensialidade ba rai halai, rai nakdoko, bailoron naruk, inundasaun no selu-seluktan ne'ebé persiza iha atendumtu espesiál husi Estadu ho prezensa Lei ida.

Deputadu bankada Fretilin mós afirma ba puúbliku katak lei ida ne'e nia prezensa sei la hamoos no muda kompeténsia konstitusionál iha Artigu 25 K-RDTL kona-ba deklarasaun Estadu Sitiu no Estadu Emerjénsia. Ida ne'e, tanba atu limita sidadaun ida nia direitu fundamentál sira tenke nafatin liu husi Parlamentu Nasionál nia autorizasaun bazeia ba pedidu husi Prezidente Repúblika.

Dekretu Parlamentár ne'e hetan veta politika husi Prezidente Repúblika iha 27 Agostu 2020, maibé ho votu apresiasaun foun ne'e iha obrigasaun konstitusional tuir Artigu 88 2) K-RDTL, Prezidente Repúblika iha loron 8 nia laran tenke promulga lei refere.

## **Reuniuan Komisaun A**

Atividade Komisaun Parlamentu Nasionál iha fulan Novembru nia laran mak fokus ba audénsia públika ho entidade relevante sira kona-ba proposta Orsamentu Jerál Estadu 2021 nian husi entidade idaidak. Aleinde ne'e, Komisaun A mós halo audénsia públika kona-ba ezbosu Lei Podér no Desentrazasaun Administrativa ho Lei Eleisaun Munisipál. Audénsia públika ba ezbosu lei rua ne'e hala'o iha Maliana, Munisípiu Bobonaro no iha Gleno, Munisípiu Ermera.

### **1. Audénsia públika kona-ba OJE 2021**

Komisaun A Parlamentu Nasionál hala'o audénsia públika ho entidade Públiku sira estadu nian kona-ba proposta OJE 2021 durante loron 5, hahú husi 06-13 Novembru 2020 iha Parlamentu Nasionál.

Audénsiasira Komisaun A halo ho entidade sira mak hanesan:

- Xefi Kaza Sivíl Prezidénsia Repúblika.
- Gabinete Primeiru Ministru (Gabineti Apoiu Sosiedade Sivil, UPMA Museu Resistênsia Timorense, AMRT, Sentru Nasionál CHEGA, I.P, INAP no IGE).
- Ministru Prezidénsia Konsellu Ministru.
- Ministru Asuntu Parlamentár no Komunikasaun Sosiál.
- Ministériu Justisa.
- Ministériu Administrasaun Estatál (Secretariadu Tékniku Administrasaun Eleitorál no Arquivo Nasionál).
- Tribunal.
- Ministériu Públiku (MP).
- Komisaun Anti Korrupsaun (CAC).
- Komisaun Funsau Públika (CFP).
- Komisaun Nasionál ba Eleisaun (CNE).
- Provedoria Direitu Umanu no Justisa (PDHJ).
- Polisia Sientifika Ivestigasaun Kriminál (PSIK).

Detallu husi audénsia hanesan tuir mai ne'e:

#### **a) Audénsia ho Xefi Kaza Sivíl Prezidénsia Repúblika**

Iha audénsiane'e, representa husi Xefi Kaza Sivíl, Sr. Francisco Vasconselhos haktuir katak progresu ezekusaun orsamentu Prezidénsia Repúblika nian iha tinan 2020 nian atinje ona 63.2% (pursentu) husi total despeza orsamentu ne'ebé alokadu hamutuk US\$6,043,788.00 hirak ne'e inklui komitmentu ho obrigasaun sira.

Proposta orsamentu tinan 2021 hamutuk milliaun US\$ 8,661,000.00 ho nia kategoria sira mak hanesan Saláriu Vensimentu US\$967,000.00, Bens no serbisu US\$6.815,000.00, Transferénsia públiku US\$250,000.00, Kapitál Minór US\$409,000.00 no Kapitál dezvoltimentu US\$220,000.00.

Programa Prezidénsia Repúblika nian iha tinan 2021 hamutuk 5 mak hanesan Identidade Nasionál, Estadu Direitu Demokrátiku, Relasaun Internasionál no diplomátika, Desenvolvimentu Sustentável no Boa Governasaun no Jestaun Institusionál.

Orsamentu husi Prezidénsia Repúblika nian iha *kelebihan* US\$270,000.00 ne'ebé sei hasai no sei tau fali US\$70,000.00 ba iha verba bens no serbisu hodi rekruta asistente ba serbisu iha Palásiu Nobre Lahane nian no US\$200,000.00 sei aloka filafali ba iha proposta adisional Ministériu Administrasaun Estatál nian atu halo barazen, fura bee moos no moru ba comunidade sira iha suku Soloi Karaik no Seloi Malere- Munisipíu Aileu.

Rekomendasaun sira iha diskusaun ba orsamentu Prezidénsia Repúblika nian mak husu atu Gabinete Prezidente Repúblika nian serbisu hamutuk ho Sekretáriu Estadu Joventude Desportu hodi tau orsamentu atu evita orsamentu ho programa hanesan de'it ka dupla ente Prezidénsia Repúblika ho Sekretáriu Estadu Joventude atu fó apoiu ba atividade eskuteriu estadu nian sira iha eskola hodi hanorin matéria edukasaun sidadania no mós nasionalizmu ba labarik sira.

**a) Audénsia ho Gabinete Primeiru Ministru, Gabinete Apoiu Sosiedade Sivil, UPMA Museu Resistênsia Timorensê, AMRT, Sentru Nasionál CHEGA, I.P, INAP no IGE**

Iha audénsiane'e, husi parte Gabinete Primeiru Ministru nian haktuir katak progresu ezekusaun orsamentu Primeiru Ministru nian iha 2020 atinje ona 65.9% (pursentu) husi totál orsamentu US\$7,001,657.00 hirak ne'e inklui komitmentu ho obrigasaun sira.

Programa Gabinete Primeiru Ministru nian iha tinan 2021 hamutuk 4 mak hanesan Reforma Estratéjia Estadu, Apoiu Sosiedade Sivil, Planeamentu Monitorizasaun no Avaliasaun no Boa Governasaun no Jestaun Institusionál.

Proposta orsamentu tinan 2021 husi Gabinete Primeiru Ministru hamutuk milliaun US\$10,267,000.00 ho nia kategoria sira mak hanesan Saláriu Vensimentu US\$506,000.00, Bens no serbisu Milliaun US\$3,208,000.00, Transferénsia Públiku US\$5,903,000.00, Kapitál Minór US\$334,000.00 no Kapitál dezvoltimentu US\$315,000.00.

Proposta adisionál husi Gabinete Primeiru Ministru nian ida ba verba Kapitál Minór hodi sosa kareta hamutuk 6 ho montante orsamentu US\$190,000.00. Kareta ne'e sei uza atu apoiu serbisu sira iha Gabinete PM hamutuk kareta 2, Apoiu Sosiedade Sivil no Auditoria Sosiál kareta 1, UPMA kareta 1, Vise PM ba Asuntu Sosiál kareta 1, Vise PM ba Asuntu Planu Ordenamentu kareta ida.

Rekomendasaun sira husi Gabinete PM nian mak husu Parlamnetu Nasionál atu konsidera kria divizaun foun rua ba Gabinete Vise PM na'in rua nian atu sira bele jere rasik sira nia orsamentu iha sira nia gabinete.

### **b) Audénsia ho Ministru Prezidénsia Konsellu Ministru**

Rezultadu ezelesaun orsamentu ba Ministru Prezidénsia Konsellu Ministru iha tinan 2020 nian ho total milliaun US\$3,807,000.00. Ministériu ezeleta ona purvoltade 80% pursentu no sei atinje 90% pursentu iha fulan rua mai tanba orsamentu ne'ebé sei restu iha tinan 2020 nian mak pagamentu enkursu sira ne'ebé ligadu ho saláriu retroativa sira no sira seluk.

Programa Ministériu Prezidénsia Konsellu Ministru nian ba tinan 2021 hamutuk 4 mak hanesan Inovasaun Administrasaun, Koordenaun Serbisu Tradusaun, Komunikaun Institusionál no Boa-Jestaun Institusionál.

Total proposta orsamentu Ministru Prezidénsia Konsellu Ministru iha tinan 2021 hamutuk milliaun US\$5,023,000.00 ho nia kategoria sira mak hanesan Saláriu Vensimentu rihun US\$522,000.00 Bens no Serbisu Milliaun US\$4,401,000.00, Kapital Minór rihun US\$100,000.00. Iha 2021, osan ba verba transferénsia públiku no kapital dezvoltamentu iha Ministru Prezidénsia Konsellu Ministru la prevee.

Programa ne'ebé atinje ona iha tinan 2020 mak iha área inovasaun administrativa no jestaun institusionál iha gabinete reforma administrativa nian mak; kria dekretu orgánika ida kona-ba administrasaun direita no indireita, dezvoltave planu estratéjiku kona-ba sistema administrasaun úniku, aprova rezolusaun kona-ba polítika reforma nian no koordena serbisu reforma iha área sira mak hanesan; fiskál, judisiál, administrasaun públika no desentralizasaun.

Iha intervensaun deputadu sira nian apresisa tebes ho apresentasaun Ministru Prezidénsia Konsellu Ministru nian no husu ba Ministru atu solisita ba Ministériu hotu-hotu nian Ministru sira hodi halo preparasaun apresentasaun ba orsamentu bazeia ba programa husi kada Ministériu sira nian haesan Ministru Prezidénsia Konsellu Ministru halo.

### **c) Audénsia ho Ministériu Asuntu Parlamentár no Komunikaun Sosiál**

Rezultadu Ezelesaun orsamentu ba Ministériu Asuntu Parlamentár no Komunikaun Sosiál ho total orsamentu iha tinan 2020 hamutuk US\$4,368,000.00 no nia ezelesaun atinje ona 87% pursentu no sei sa'e ba 90% iha fulan ruma mai tanba la iha projeitu foun iha orsamentu tinan 2020 nian no husi orsamentu sira ne'e so halo pagamentu ba dívida sira iha tinan sira uluk no selu saláriu de'it.

Programa prinsipál Ministériu nian iha tinan 2021 hamutuk 3 mak hanesan Konsolidasaun Lejislativa no Judisiária, Garantia Liberdade ba Espresaun no Asesu ba Informasaun no Boa Governasaun no Jestaun Institusionál.

Ministériu Asuntu Parlamentár no Komunikaun Sosiál ho nia totál despeza orsamentu ne'ebé propoin iha tinan 2021 hamutuk milliaun US\$9,930,000.00 ho nia kategoria sira mak hanesan Saláriu Vensimentu rihun US\$866,000.00, Bens no Serbisu milliaun US\$2,736,000.00, Transferénsia Públiku hamutuk Milliaun US\$3,410,000.00 Kapitál Minór mil US\$218,000.00 no Kapitál Dezenvolvimentu Milliaun US\$2,700,000.00.

Ministériu ne'e la iha proposta adisionál ba orsamentu ministériu nian hodi husu aumentu no la iha mós rekomendasaun husu Komisaun A.

#### **d) Audénsia ho Ministériu Justisa**

Rezultadu ezekeusaun orsamentu husi ministériu justisa nian ba tinan 2020 ho montante orsamentu hamutuk milliaun US\$11,609,323.00, ministériu ezekeuta ona hamutuk 85.1% (pursentu) no kompromitidu sei atinje 95% iha fulan rua tuir mai tanba orsamentu sira ne'e atu selu de'it dividas sira ne'ebé Governu anteriór husik hela.

Iha intervensaun ministru mós haktuir katak divida sira ne'ebé la iha kontratu ligadu ho *Catering* sira ne'ebé durante ne'e kompañia sira fornese la iha kontratu ministériu sei la selu no karik atu selu tenke ho desizaun Konsellu Ministru mak ministru bele aloka nia orsamentu.

Proposta orsamentu Ministériu Justisa nian ba tinan 2021 Governu propoin orsamentu ho totál hamutuk milliaun US\$15,523,000.00, ne'ebé fahe ba kategoria sira mak hanesan tuir mai Saláriu no vensimentu milliaun US\$5,208,000.00, bens no serbisu miliaun US\$6,943,000.00, Transferénsia Públiku milliaun US\$2,067,000.00, Kapitál Minór US\$754,000.00 no Kapitál Dezenvolvimentu US\$551,000.00.

Programa ministériu Justisa ba tinan 2021 hamutuk 9 mak hanesan Asesu ba Justisa, Serbisu Prizionál no Reinsersaun Sosiál, Direitu Umanu, Jestaun ba Rai no Propriedade, Rejistu Notariadu no Identifikasaun Sivil, Konsolidasaun Lezislativa no Judisiária, Implementasaun Polítika Jéneiru, Boa-Governasaun no Jestaun Institusionál no Edifisiu Públiku.

Ministériu ne'e iha rekomendasaun husi Komisaun A husu atu kompleta lei komplementár sira hodi atribui título rai nian ba komuniadade sira ne'ebé nia rai rejistu ona no durante ne'e la iha disputa hodi nune'e bele fasilita komuniadade sira hoi bele uza rai ba halo negósiu no seluktan.

Deputadu sira mós husu atu ministériu liu husi Sekretáriu Estadu Teras atu kontinua halo programa rejistrasaun ba rai ne'ebé seidauk rejistu iha tempu SNC nian.

#### **e) Audénsia ho Tribunál**

Progresu ezekeusaun orsamentu tribunál nian ba tinan 2020 ho totál orsamentu ne'ebé alokadu ho nia montante hamutuk US\$6,014,244.00 rezultadu ezekeusaun too fulan Novembru ne'e atinje ona 61.6% (pursentu) no falta 39% (pursentu) ne'ebé tribunál kompromitidu atu ezekeuta hotu tanba iha verba bens serbisu no saláriu ba funsionáriu no juis sira ne'ebé sai dividade iha tinan sira uluk no agora sei halo pagamentu hotu iha tinan nia rohan.



Programa tribunál nian iha tinan 2021 hamutuk 3 mak hanesan Aproxima Serbisu Tribunál ho Populasaun, Asesu ba Justisa no Boa-Governsaun no Jestaun Institusionál.

Proposta orsamentu tribunál nian ba tinan 2021 ho nia total milliaun US\$8,389,000.00, ne'ebé kompostu husi kategoria sira mak hanesan Saláriu no vensimentu milliaun US\$3,432,000.00, bens no serbisu muliaun US\$3,021,000.00, Transferénsia Públiku milliaun US\$00, Kapital Minór milliaun US\$1,053,000.00 no Kapital Dezenvolvimentu US\$882,000.00.

Orsamentu ba Kapital minór sei uza hodi sosa kareta operasionál sira no mós sosa ekipamentu edifísiu nian kona-ba gravasaun lian hamutuk 3 hodi tau iha edifísiu Tribunál Dili, Suai no Baucau inklui sosa empresora 1 iha Tribunál Rekursu.

Orsamentu ba Kapital dezenvolvimentu sei aloka ba hadi,a rezidénsia juis sira iha Baucau, Suai no Oekusi inklui hadi'a edifísiu Tribunál Rekursu.

#### **f) Audénsia ho Ministériu Públiku (MP)**

Progresu ezekusaun orsamentu MP nian ba tinan 2020 ho total orsamentu ne'ebé alokadu hamutuk milliaun US\$4,084,493.00 no nia rezultadu ezekusaun too fulan Novembru ne'e foin mak atinje ona 41% (pursentu).

Prokuradór Jerál Repúblika iha nia esplikasaun ba progresu ezekusaun orsamentu tinan 2020 nian haktuir mós katak sira iha tinan 2020 ezekusaun la atinje ho másimu hanesan tinan sira uluk tanba prosesu sira iha obras públiku no KAFI mak halo pagamentu ba projetu sira tarde ne'ebé mak rejulta ezekusaun orsamentu MP nian iha tinan ne'e sei afeta ba reapropiasaun ba orsamentu sira ne'e.

Programa MP nian iha tinan 2021 hamutuk 2 mak hanesan Asesu ba Justisa no Boa-Governsaun no Jestaun Institusionál.

Proposta orsamentu Ministériu Públiku nian iha tinan 2021 ho nia motante total milliaun US\$4,787,000.00, ne'ebé fahe ba kategoria sira mak hanesan Saláriu no vensimentu milliaun US\$ 2,265,000.00, bens no serbisu muliaun US\$1,373,000.00, Transferénsia Públiku milliaun US\$00, Kapital Minór US\$500,000.00 no Kapital Dezenvolvimentu US\$650,000.00.

Orsamentu ba Kapital minór ho montante US\$500,000.00 sei uza atu sosa ekipamentu edifísiu foun rua ne'e nian ne'ebé iha prosesu konstrusaun hela no sei finaliza iha tinan 2021.

Prokuradór Jerál mós haktuir katak sei iha proposta adisionál atu reapropria orsamentu ba verba kapital dezenvolvimentu nian sobre konstrusaun pagamentu ba edifísiu rua ne'e sekuandu prosesu pagamentu la konklui iha tinan ida ne'e nia rohan.

#### **g) Audénsia ho Ministériu Administrasaun Estatál (MAE)**

Progresu ezekusaun orsamentu MAE nian ba tinan 2020 ho total orsamentu ne'ebé alokadu hamutuk milliaun US\$14,729,411.00 no nia rezultadu ezekusaun too fulan Novembru ne'e foin mak atinje ona 67.9% (pursentu) no ida ne'e inklui mós komitmentu no obrigasaun sira ho nune'e saldo atuál husi MAE nian mak agora milliaun US\$9,717,238.78.

Programa MAE nian ba tinan 2021 nian hamutuk 5 mak hanesan Implementasaun Polítika Jéneiru, Boa-Governasaun no Jestaun Institusionál, Organizaun Urbana, Desentralizaun Administrativa, Dezenvolvimentu Suku no Retornu Ekonómiku.

Proposta orsamentu Ministériu Administrasaun Estatál nian ba tinan 2021 ho nia montante totál milliaun US\$49,342.00 ho nia verba sira mak hanesan Saláriu no vensimentu milliaun US\$3,145,000.00, bens no serbisu milliaun US\$8,479,000.00, Transferénsia Públiku milliaun US\$33,171,000.00, Kapítal Minór milliaun US\$4,216,000.00 no Kapítal Dezenvolvimentu US\$330,000.00.

Proposta adisionál husi Ministériu Administrasaun Estatál nian ida ho nia totál hamutuk US\$200,000.00 iha verba Kapítal dezenvolvimentu ne'ebé sei aloka ba atividade fura be mós, rehabilitasaun irigasaun, konstursaun ponte no bareira iha suku Selo Kraik no Selo Malere-Munisípiu Aileu.

Partisipa iha audénsiane'e mós Prezidente Autoridade Munisipál sira no mós Administradór Munisípiu sira ne'ebé mak foin pela primeiravez partisipa iha aundensia públiku kona-ba orsamentu jerál estadu ba tinan 2021.

#### **h) Audénsia ho Komisaun Anti Korrupsaun (KAK)**

Progresu ezekusaun orsamentu KAK nian ba tinan 2020 ho totál orsamentu ne'ebé alokadu hamutuk milliaun US\$1,148,314.00 iha nia rezultadu ezekusaun too Novembru ne'e atinje ona 80.0% (pursentu) no ida ne'e inklui mós komitmentu no obrigasaun sira ho nune'e saldo atuál husi KAK nian mak agora milliaun US\$915,034.58.

Programa KAK nian ba tinan 2021 nian hamutuk 2 mak hanesan Asesu ba Justisa no Boa-Governasaun no Jestaun Instusionál.

Proposta orsamentu KAK nian ba tinan 2021 ho nia montante totál milliaun US\$1,784,000.00 ho nia verba sira mak hanesan Saláriu no vensimentu US\$938,000.00, bens no serbisu US\$635,000.00, Transferénsia Públiku milliaun US\$00, Kapítal Minór milliaun US\$211,000.00 no Kapítal Dezenvolvimentu US\$00.

Orsamentu ba KAK sei aumenta tanba sei iha proposta adisionál ho montante hamutuk US\$705,724.50, ne'ebé sei aloka ba verba sira bens no serbisu hamutuk US\$449,274.50 item seluk ba verba Kapítal Minór ho nia montante US\$256,450.00 ba sosa kareta no ekipamentu informátika no seluktan.

Rekomendasun ba iha KAK nian mak husu atu aselera prosesu sira sosiálizasaun ba implementsaun Lei Medida sira Prevensaun no Kombate Korrupsaun.

#### **i) Audénsia ho Provedoria Direitu Umanu no Justisa (PDHJ)**

Progresu ezekusaun orsamentu PDHJ nian ba tinan 2020 ho totál orsamentu ne'ebé alokadu hamutuk milliaun US\$1,155,894.00 iha nia rezultadu ezekusaun too Novembru ne'e atinje ona 89.3% (pursentu) no ida ne'e inklui mós komitmentu no obrigasaun sira ho nune'e saldo atuál husi PDHJ nian mak agora milliaun US\$1,032,312.15.

Proposta orsamentu ba PDHJ iha tinan 2021 ho nia totál hamutuk milliaun US\$1,857,000.00 ne'ebé alokadu ba verba sira ho nia kategoria mak hanesan Saláriu Vensimentu US\$864,000.00 Bens no Serbisu US\$896,000.00, Transferénsia Públika US\$00, Kapitál Minór US\$97,000.00 no Kapitál Dezenvolvimentu US\$0.

Programa prinsipál PDHJ iha tinan 2021 mak hanesan Direitu Umanu, Boa-Governasaun no Jestaun Institusionál.

Proposta adisionál husi PDHJ ida de'it ne'e alokadu iha rúbrika ho nia kategoria Bens Serbisu ho nia montante orsamentu hamutuk US\$120,000.00.

Orsamentu ne'e sei uza ba viazen lokál ba apoiu atividade desiminaun informasaun kona-ba Lei Medida sira Prevensaun no Kombate Korrupsaun no atividade seluk mós ba rekrutamentu serbisu asistente tékniku hodi hakerek relatóriu temátiku 5 kona-ba Konvensaun Internasionál sira nia implementasaun iha Timor –Leste ho nia valór orsamentu US\$80,000.00.

#### **j) Audénsia ho Komisaun Funsau Públika (KFP)**

Progresu ezekusaun orsamentu KFP nian ba tinan 2020 ho totál orsamentu ne'ebé alokadu hamutuk milliaun US\$2,240,244.00 no iha nia rezultadu ezekusaun too Novembru ne'e atinje ona 73.6% (pursentu) no ida ne'e inklui mós komitmentu no obrigasaun sira ho nune'e saldo atuál husi Komisaun Funsau Públika nian mak agora milliaun \$1,504,052.00.

Proposta orsamentu Komisaun Funsau Públika (KFP) iha tinan 2021 nian ho totál milliaun US\$3,019,000.00 ne'ebé alokadu ba rúbrika sira ho nia kategoria mak hanesan saláriu vensimentu milliaun US\$1,348,000.00 bens no serbisu milliaun US\$1,499,000.00, Transferénsia Públika US\$17,000.00 mil, Kapitál minór US\$155,000.00 no kapitál dezenvolvimentu US\$0

Programa prinsipál KFP iha tinan 2021 kompostu husi program 3 mak hanesan Jestaun ba Dezenvolvimentu Funsau Públika no Boa-Governasaun no Jestaun Institusionál.

KFP iha proposta adisionál ba sosa kareta foun Komisáriu Funsau Públiku nian no sosa ekipamentu *server* foun. Proposta ne'e ho nia valór orsamentu US\$97,500.00 tama iha Kapitál minór.

Rekomendasaun sira ba KFP nian atu kria sistema ho rigór hodi ajuda resolve funsionáriu RDTTL,ep nian ne'ebé oras ne'e destakadu iha instituisaun estadu sira nian estatutu orsamentu.

Halo intervensaun iha ministériu sira hodi halo planu forsa traballu ho di'ak no rigór hodi evita funsionáriu sira la halo nia funsau serbisu ho di'ak.

#### **k) Audénsia Komisaun A ho Komisaun Nasionál ba Eleisaun (CNE)**

Progresu ezekusaun orsamentu CNE nian ba tinan 2020 ho totál orsamentu ne'ebé alokadu hamutuk milliaun US\$7,275,526.00 iha nia rezultadu ezekusaun too Novembru ne'e atinje ona 21.8% (pursentu) no ida ne'e inklui mós komitmentu no obrigasaun sira ho nune'e saldo atuál husi CNE nian mak agora milliaun US\$1,597,095.06.

Ezekusaun Orsamentu ba CNE nian ki'ik iha tinan 2020 no la bele atinji ho másimu tanba orsamentu milliaun US\$6.000.000.00 subvensaun públiku ba partidu sira ne'ebé hetan asentu iha Parlamentu ba tinan ida ne'e nian prosesu la'o tarde hodi partidu sira nia prosesu hatama relatóriu no tanba ne'e difikulta CNE halo verifikasuan ba sira nia relatóriu sira antes atu halo pagamentu subsídiu ida ne'e ba sira.

Proposta orsamentu ba CNE iha tinan 2021 ho nia montante Orsamentu ne'ebé alokadu milliaun US\$8,369,000.00 no orsamentu hirak ne'e alokadu ba verva sira ho nia kategoria mak hanesan saláriu vensimentu US\$818,000.00, bens no serbisu milliaun US\$1,306,000.00, transferénsia Públika milliaun US\$6.000,000.00, Kapital minór US\$245 no kapital dezvoltamentu US\$0

Programa prinsipal Komisaun Nasionál ba Eleisaun iha tinan 2021 kompostu husi programa 2 mak hanesan Elisaun Demokrátika no Boa-Governasaun no Jestaun Institusionál.

Proposta adisionál husi CNE nian iha 2 mak hanesan ida alokadu ba verba sira kona-ba bens serbisu no kapital minór.

Proposta adisionál husi CNE nian iha diskusaun finál husi deputadu sira konsidera la nesesáriu atu husu aumentu no proposta sira ne'e husu osan aumentu ba halo salaun apuramentu iha munisípiu Suai no Aileu no halo edifísiu CNE iha Ermera ho Baucau no mós halo edukasaun sívika iha Timor-Laran.

Deputadu sira mós rekomena ba iha CNE ho STAE atu define sira nia serbisu ho di'ak hodi evita konfuzasun públiku nian ba serbisu ne'ebé hanesan ka dupla funsaun iha instituisaun rua ne'e iha futuru.

### **I) Audénsia ho Polisia Siéntifika Ivestigasaun Kriminál (PSIK)**

Progresu ezekusaun orsamentu PSIK nian ba tinan 2020 ho totál orsamentu ne'ebé alokadu hamutuk milliaun US\$1,390,253.00 iha nia rezultadu ezekusaun too Novembru ne'e atinje ona 88.7% (pursentu) no ida ne'e inklui mós komitmentu no obrigasaun sira ho nune'e saldo atuál husi PSIK nian mak agora milliaun US\$1,232,763.05.

Proposta orsamentu ba PSIK iha tinan 2021 ho nia totál hamutuk milliaun US\$2,035,000.00, ne'ebé alokadu ba verba sira ho nia kategoria mak hanesan saláriu vensimentu US\$1,144,000.00, bens no serbisu US\$426,000.00 transferénsia Públika US\$00, kapital minór US\$465,000.00 no kapital dezvoltamentu US\$0

Programa prinsipal PSIK iha tina 2021 mak hanesan Asesu ba Justisa no Boa-Governasaun no Jestaun Institusionál.

Rekomendasuan Komisaun A ba PSIK atu define serbisu investigasaun ne'ebé loos no di'ak entre polísia PNTL TIK ho PSIK ligadu ho entidimentu kazu sira iha terenu.

Komisaun mós husu atu hametin serbisu hamutuk entre CAC, TIK, MP no PSIK rasik iha investigasaun konjunta ba kazu trans nasionál sira ne'ebé envolve ema barak ho tipu kazu krime oin-oin.

## **2) Reuniaun Komisaun A iha 16 Novembru 2020**

Reuniaun komisaun A Parlamentu Nasionál iha 16 Novembru 2020 ho agenda diskusaun mak hanesan:

- Diskusaun Komisaun ba apresisaun rekomendasaun sira husi rezultadu audénsia.

Iha diskusaun ba rekomendasaun sira ne'e, deputadu sira konsidera asuntu sira ne'ebé atu rekomena ba kada instituisaun estadu sira ne'ebé durante halo audénsia ho Komisaun A, relasiona planu proposta orsamentu jerál estadu ba tinan 2021.

Instituisaun hirak ne'e mak durante ne'e Komisaun A Parlamentu Nasionál halo audénsia mak hanesan Xefi Kaza Sivíl Prezidente Repúblika, Gabinete Primeiru Ministru, Ministru Prezidénsia Konsellu Ministru, Ministru Asuntu Parlamentár no Komunikasaun Sosiál, Ministru Justisa, Ministru Admistrasaun Estatál, Tribunal Rekursu, Prokuradór Jerál Repuúblika, Komisaun Anti Korrupsaun, Komisaun Funsuun Públiku no Komisaun Nasionál Eleisaun.

Rezultadu diskusaun durante audénsia ho nia rekomendasaun sira mak hanesan:

1. Ba Prezidente Repúblika husu atu serbisu hamutuk ho Sekretáriu Estadu Juventude Desportu hodi kria eventu nasionaál ba eskuteriu estadu nian iha atividade eskola nian liu-liu liga ba dezenvolvimentu materia sobre nasionalizmu no sira seluktan.
2. Ba Primeiru Ministru husu atu hadi'a formatu sistema orsamentu bazeia ba progrma ne'ebé tenke akomoda programa ministériu sira nian hodi labele difikulta deputadu sira halo apresisaun ba proposta orsamentu no fiskalizasaun.
3. Husu mós ba PM, Ministériu Finansa no Ministériu sira atu halo uniformizasaun ba número orsamentu iha livru orsamentu sira no iha proposta orsamentu ne'ebé deputadu sira atu aprova.
4. Ba PM atu kria orgánika ketak ba Gabinete Vise-Primeiru Ministru na'in rua hodi fasilita serbisu Vise na'in rua nian.
5. Rekomenda ba Ministru Asuntu Parlamentár no Komunikasaun Sosiál atu rezolve prolema saláriu eis-funsionáriu RTTL, ep nian iha futuro.
6. Rekomenda ba Ministériu Justisa atu kontinua halo rejistu predial ba sidadaun sira nian hodi hatama iha sistema GPS.
7. Husu ba Ministériu Justisa mós atu elabora lei komplementár sira hodi prodús sertifikadu ba ema sira sai na'in ba rai ne'ebé la iha ona disputa.
8. Husu ba Ministériu Públiku atu serbisu hamutuk ho KAK no PSIK hodi hadi'a serbisu investigasaun iha futuro ho qualidade di'ak liutan.

9. Ba CNE ho STAE husu atu define didi'ak serbisu instituisaun rua ne'e nian hodi labele akontese sobrepoin iha nia atividade serbisu sira iha eduksaun sivika ba sidadania sira.
10. Ba Kamisaun Anti Korrupsaun atu halo serbisu makas hodi habelar informasaun sobre implementasaun Lei Medidaun Prevensaun no Kombate Korrupsaun ante implementa.
11. Rekomenda atu Governu klarifika Artigu 21 alineaia 3 kona-ba responsabilidade financeira husi titular kargu politik nian.

Instituisaun sira ne'ebé iha proposta adisional ba husu aumentu mak hanesan:

- Prezidente Repúblika husu atu hamenus orsamentu US\$270.000.00 no US\$70,000.00 mil alokadu fila fali ba bens serbisu hodi halo rekrutamentu ba asesor sira iha Prezidente Repúblika.
- Gabinete Primeiru Ministru nian ho total US\$190,000.00 ba sosa kareta 6 no orsamentu ida ne'e muda rubrika husi bens serbisu ba kapital minor.
- Proposta adisional husu aumenta husi provedoria direitus umanu nian ho total hamutuk 120,000.00, ne'e alokadu ba verba ho kategoria sira bens serbisu nian ho nia atividade sira mak hanesan viazen lokal ba atividade desiminasau informasaun sira no kontratu tekniku ba hakarek relatoriu sobre implementasaun konvensaun sira.
- Proposta adisional husi Ministeriu Estatal ho valor total US\$200,000.00 ba suku Selaui Malere no Selo Kraik ba verba kapital dezvoltamentu ho nia atividade sira mak rehabilitasaun irigasaun, fura bemós, konstrusaun ponte no kontrusaun bareira.
- Proposta adisional husi Komisaun Anti Korrupsaun nian ida ho montante orsamentu hamutuk US\$705.724,50, orsamentu hirak ne'e alokadu ba verba besn no serbisu ho valor 449.274.50 no alokadu ba kapital minor US\$256.450,00 atu sosa kareta no ekipamentu informatika ba ofisiu nian.
- Proposta adisional husi CNE nian deputadu sira sei diskuti tanba konsidera la nesesariu atu husu aumentu no proposta sira ne'e mak husu osan aumentu ba halo salaun iha Suai no Aileu, halo edifisiu CNE iha Ermera ho Baucau no mos halo eduksau sivika iha Timor Laran.

### **3) Reuniaun komisaun A Parlmantu Nasionál iha 17 Novembru 2020**

Reuniaun Komisaun A ho nia ajenda diskusaun mak hanesan:

- Aprovasaun relatoriu paraser Komisaun A, Parlamentu Nasionál kona-ba rezultadu audénsiaPúbliku sira ho instituisaun estadu sira ba Orsamentu Jerál estadu 2021.

Iha apresiaun ba relatoriu komisaun A nian antes halo votsaun deputadu sira apronta kestaun sira ne'ebé sai rekomendasaun ba iha relatoriu komisaun A iha sira nia apresiaun ba Orsamentu Jerál Estadu ba tinan 2021 ho nia rekomendasaun sira hamutuk 12 ba Governu enjerál no rekumendasaun ba iha ministeriu no instituisaun tuteladu sira ne'ebé audénsiaho komisaun A atu rezolve sira nia prolema sira ne'ebé komisaun A identifika iha audénsia sira durante loron lima (5).

Rekomendasaun hirak ne'e jerálmente liga ho jestaun orsamentu bazeia ba programa, ezekusaun no jestaun ne'ebé ligadu ho formatu foun, liña koordenasaun serbisu entre instituisaun sira no seluktan.

Entertantu totál proposta adisionál hamutuk sanulu (10) husi instituisaun sira mak hanesan Prezidente Repúblika iha proposta 2, Gabinete Primeiru Ministru iha proposta 2, Ministériu Estatál iha proposta 1, Komisaun Anti Korrupsaun (KAK) iha proposta 2, Komisaun Nasionál Eleisaun (CNE) iha proposta 1, Komisaun Funsau Públiku 1 no proposta 1 husi Provedoria Direitu Umanu no Justisa.

Orsamentu ne'ebé sei foti hodi aloka ba proposta hirak ne'e tuir fontes ne'ebé konfirmadu husi Prezidente komisaun A ho vise-Ministra Finansas husu atu foti osan ne'e liuhusi verba viazen estranjeiru nian no Fundu Kontizenti.

Rezultadu votasaun ba relatóriu paraser komisaun A, Parlamentu Nasionál nian kona-ba rezultadu audénsiaho instituisaun estadu sira, aprova ho unanimidade husi totál deputadu prezenti nain 8, entertantu deputadu nain 3 husi bankda CNRT la marka prezensa iha reuniaun ohin.

Ministériu no instituisaun estadu sira mak hanesan Prezidente Repúblika, Primeiru Ministru, Ministru Konsellu Prezidénsia, Ministru Asuntu Parlamentár no Komunikasaun Sosiál, Ministru Justisa, Ministru Admistrasaun Estatál, Tribunal, Ministériu Públiku, Komisaun Anti Korrupsaun, Komisaun Funsau Públiku, STAE, Arquivo Nasionál no Komisaun Nasionál da Eleisaun.

#### ***4) Audénsia Públika Komisaun A PN kona-ba Lei Podér Lokál no Desentralizasaun Administrativa ho Lei Eleitorál Munisipál***

##### **a) Audénsia Komisaun A iha munisípiu Bobonaro**

Komisaun A iha 20 Novembru halo audénsia públika kona-ba ezbosu Lei Podér Lokál no Desentralizasaun Administrativa ho Lei Eleitorál Munisipál ho autoridade lokál sira ne'ebé kompostu husi Prezidente Autoridade Munisipál Bobonaro ho nia dirijente sira mak hanesan Diretór, xefe suku inklui mós representante líder partidu polítiku sira no representante imprezáriu sira iha munisípiu refere.

Iha abertura husi Prezidente Autoridade Munisipál Bobonaro hatoo nia agradese barak ba inisiativa Komisaun A hodi hakat mai munisípiu Bobonaro atu konsulta lei rua ne'e no nia parte sei kontribui ba hodi fó hanoin atu Lei ne'e bele sai di'ak hodi refléta ba ema hotu nia interese no nia mós haktuir katak munisípiuBobonaro kleur tebes ona hein no pruntu ona atu simu desentralizasaun.

Iha intervensaun deputadu Prezidente nian haktuir katak objetivu husi AudénciaPúbliku ne'e mak nu'udar meu ida atu rona direita hanoin sira husi autoridade lokal nia prespektiva sobre Lei Poder Lokal no Desentralizasaun Administrativa nomós Lei Eleitoral Munisipal ne'ebé tuir nian importante no pertinenti tebes ba deputadu komisaun atu halo ida ne'e hodi rona barak liuhusi ita boot sira nu'udar autoridade lokal ne'ebé Lei ne'e abanbainrua implementa karik sei halo lao husi ita boot sira.

Nia mós intriduz sumariu kona-ba oinsa lei ne'e hetan feta husi Prezidente Repúblika, Dr. Francisco Guterres iha Terseira Lezislatura nia tempu ho nia razaun sira mak la konkorda ho Artigu 55 ligadu ho veteranu sira na'in 5 ne'ebé nomeia de'it husi Konsellu Veteranu sira iha munisípiu hodi sai deputadu Assembleia Munisipál.

Razaun seluk mós Prezidente Repúblika apresenta kona-ba prontidaun no preparasaun munisípiu sira atu simu delegasaun kompeténsia iha tempu ne'ebá no too agora oinsa no asuntu sira seluktan.

Durante diskusaun, asuntu ne'ebé sai preokupasaun hosi partisipante sira mak hanesan kestaun kona-ba Artigu 33 kona-bá delegasaun podér sira tanba sa tenke limite no Artigu 50 kona-ba representante veteranu na'in 5 ne'ebé sai membru Assembleia Munisipál la liu hosi eleisaun no mós lamenta ho esbosu lei rua ne'e, ne'ebé la distribui antes diskusaun inklui preokupasaun kona-bá seriedade Parlamentu Nasionál nian atu diskute no aprova lei refere tanba tuir sira tempu no orsamentu sira estadu nian barak Parlamentu Nasionál gasta ba lei rua ne'e, maibé too agora seidak bele finaliza tanba saida.

Hatan ba kestaun hirak ne'ebé autoridade lokál sira apresenta, Prezidente Komisaun A konsidera katak preokupasaun sira ne'e iha razaun no sei toma nota hodi inklui iha relatóriu hodi bele sai materia diskusaun iha Komisaun A nian ba lei rua ne'e iha diskusaun no aprovasaun sira.

Nia mós akresenta tan katak Komisaun mai iha ne'e la mai atu resposta pergunta sira, maibé rona de'it hodi bele tau iha konsiderasaun ba iha materia lei ne'ebé Komisaun atu diskuti no aprova. Ba pergunta no rekomendasaun sira hotu ne'ebé autoridade sira hatoo ona, Komisaun A sei halo de'it pontu esklaresimentu ida ba autoridade sira o sei la halo resposta.

Komisaun A iha komitmentu atu finaliza lei ne'e no tanba ne'e mak Komisaun halo audénsia hodi bele aselera prosesu diskusaun ba lei ne'e tanba Parlamentu Nasionál konsidera lei rua ne'e urjente. Enkuantu kona-ba Artigu 33 kompeténsia sira sei regula tuir kapasidade Governu lokál nian atu jere no buat ne'ebé kabe ba kompeténsia Governu sentral nian Governu sentrá mak sei kontinua halo duni.

Ligadu ho preokupasaun ba aplikasaun Artigu 50 número 2 kona-ba kompozisaun membru Assembleia Munisipál nian ne'ebé involve hosi veteranu sira na'in 5 no la iha direitu atu vota, Deputadu Komisaun A esplika katak ida ne'e mós hamihis ita-nia demokrásia ne'ebé la'o ona, maibé intensaun hosi tau artigu ida ne'e mak tanba konsidera papél veteranu nian agora importante tebes iha nasaun ne'e no deputadu sira konsidera preokupasaun ne'e atu diskute no desidi fila-fali artigu ne'e iha diskusaun Komisaun nian.



Iha inseramentu ba diskusaun ne'e, Prezidente Autoridade Minisipál Bobonaro afirma katak nia parte sei kontinua halo diskusaun ba lei rua ne'e ho autoridade sira iha munisípiu hodi submete sira nia submisaun eskrita ba iha Komisaun A Parlamentu Nasionál iha tempu tuir mai antes tama iha diskusaun no aprovasaun lei refere.

## **b) Audénsia Komisaun A iha Ermera**

Komisaun A Parlamentu Nasionál (PN) iha 26 Novembru 2020 realiza audénsia pública iha munisípiu Ermera kona-ba Esbosu Lei Podér Lokál no Desentralizasaun Administrativa no Lei Eleitorál Munisipál.

Audénsia ne'e hala'o ho prezensa husi autoridade lokál sira ne'ebé kompostu husi Adjunuo Prezidente Autoridade Munisípiu Ermera ho nia diretór munisipál sira, xefe suku, representante relijiozu sira, representantre partidu polítiku sira, veteranu, NGO no grupu feto sira.

Iha introdusaun ba materia husi Prezidente Komisaun A distintu deputadu Joaquim dos Santos haktuir katak objetivu husi audénsia ne'e mak atu rona barak husi autoridade lokál sira kona-ba saida mak sira-nia preokupasaun relasiona ho estableimentu lei ne'e no mós artigu sira ne'ebé persiza Komisaun A atu diskuti hodi hadi'a atu bele produz lei rua ne'e ho kualiadade no refléta duni situsaun atuál iha rai laran.

Aleinde ne'e, nia mós apresenta pergunta esensiál sira ne'ebé sai nu'udar preokupasaun xave iha lei rua ne'e mak hanesan:

Pergunta relasiona ho Lei Podér Lokál no Desentralizasaun Administrativa:

- Importante ka lae Lei podér Lokál ne'e (urgenti ka lae)?
- Vantajen no Disvantejen husi Lei Poder Lokál ligadu ho reseita no taxa sira oinsa?
- Assembleia Munisipál ne'e atu funsiona oinsa?
- Deputadu Assembleia Munisipál ne'e bele halo profisaun seluk ka lae?
- Mandatu Deputadu Assembleia Munisipál too tinan hira?
- Renúnsia ho nia direitu no devér sira regula oinsa?
- Kompozisaun Meza Assembleia Munisipal nian oinsa?
- Prezidente Meza no nia vise sira nia kompeténsia too iha ne'ebé?
- Assembleia Munisipal Munisipal tomak ne'e nian kompeténsia too iha ne'ebé?
- Kompeténsia Konsellu Konsultativu ho nia kompozisaun ne'e oinsa?
- Rekezitu sira ba kandidatura Prezidente Kámara?

Pergunta relasiona ho Lei Eleitorál Munisipál:

- Modellu Eleisaun ida ne'ebé mak apropiadu liu?
- Organizasaun ba lista sira oinsa?
- Rekezitu sira ba eleisaun deputadu Assembleia Munisipal oinsa?
- Rekezitu sira ba eleisaun Prezidente Autoridade Munisipál oinsa?
- Durasan tempu ba kampaña eleitorál husi kandidatu sira?

- Ofisiál Eleitorál oinsa?
- Fiskais Eleitorál oinsa?
- Propaganda Eleitorál oinsa?

Prezidente Komisaun A mós apresenta razaun Prezidente Repúblika veto lei rua ne'e iha Lezislatura Datoluk nia tempu ho razaun mak hanesan:

- Prontidaun munisípiu sira nian atu simu delegasaun kompeténsia sira ne'e.
- Art 50 alineaia 2 kona-ba involvimentu veteranu sira na'in 5 ne'ebé indika husi Konsellu Veteranu la liuhusi eleisaun hodi sai deputadu Assembleia Munisipál.
- Kestaun kompeténsia sira kona-ba SERVE ba rejistu kompañia sira ho nia taxa.
- Kestaun kompeténsia sira kona-ba kontrola Ajénsia Metodologia nian.

Iha intevensaun autoridade lokál sira nian konsidera Lei Poder Lokál no Desentralizasaun Administrativa importante ba sira atu lori dezenvolvimentu ba povu too iha baze hodi sente. Sira mós lamenta katak kle'ur ona munisípiu hein no pruntu tiha ona atu estabelese desentralizasaun no sira mós husu atu se lei ne'e aprova no públika sira husu atu aplika uluk iha munisípiu Ermera.

Autoridade lokál sira mós husu ba Parlamentu Nasionál atu seriu hodi diskute lei rua ne'e hodi bele finaliza lalais atu bele aplika tanba tuir sira nia prespetiva lei hotu halo sei la kompletu, maibé importante tenke iha lei ruma mak aplika uluk hodi guia serbisu sira kona-ba desentralizasaun no bele tuir mai bele hadia tuir situasaun real tanba ne'e la'ós kestaun pruntu ka lae tanba desentralizasaun tuir sira nia esperiénsia sira iha tempu Indonézia ho ukun militarizasaun bele aplika tanba saida mak ohin loron Timor-Leste ukun an labele aplika.

Partisipante sira mós lamenta tanba Komisaun A foin fahe esbosu lei rua ne'e bainhira hahú audénsia tanba ne'e difikulta tebes atu fó komentáriu sa tan lei rua ne'e ho Lian Portugés hotu tanba ne'e sira so rekomenda de'it no la fó komentáriu barak kona-ba lei rua ne'e no sira kompromete sei submete sira-nia rekomendasaun eskrita.

Pergunta sira ne'ebé Komisaun rezista atu diskuti iha diskusaun lei rua ne'e mak hanesan:

- Oinsa fahe reseitas sira entre Governu sentrá ho Governu Lokál?
- Kritériu kandidatura sira ba Assembleia Munisipál labele hamosu diskriminasaun liu-liu ba representante veteranu no independente?
- Kritériu kandidatura ba Prezidente Autoridade tenke mai ho ema ne'ebé moos no iha kredibilidade.
- Partisipante sira balun husu veteranu sira nia representasaun tenke iha de'it Konsellu Konsultativu.
- Valór sira ligadu ho direitu no devér deputadu Assembleia Munisipál kompara ho deputadu Parlamentu Nasionál tenke tetu fila-fali.

Deputadu sira iha audénsia ne'e la halo resposta, maibé fó sira nia komentáriu jerál de'it liga ho importánsia hosi lei ne'e tuir sira nia prespetiva polítika partidu nian ne'ebé husi representante deputadu sira husi bankada sira ne'ebé sai membru Komisaun A, hanesan Partidu CNRT, Fretilin, KHUNTO no PLP kompromitidu sei fó apoiu tomak ba finaliza diskusaun lei ne'e tanba konsidera lei rua ne'e importante ba Timor-Leste.

Observasaun JSMP nota katak tékniku sira husi Komisaun A foin mak fahe esbosu lei ne'e bainhira hahú abertura ba diskusaun lei rua ne'e ho Autoridade local sira no la iha sumáriu informasaun ne'ebé suficiente ba guia autoridade lokál hodi kompriende di'ak lei rua ne'e atu bele participa di'ak iha diskusaun ba esbosu lei rua ne'e.

Aleinde ne'e lei rua ne'e sei nafatin ho versaun Porgues ne'ebé difikulta tebes autoridade lokál sira atu intende di'ak artigu sira ne'ebé define iha lei rua ne'e.

## **Komisaun C Parlamentu Nasionál**

Semináriu kona-ba panorama orsamentál nian ba Orsamentu Jerál Estadu tinan 2020 ne'ebé apresenta husi instituisaun estadu sira no entidade ka parseiru internasionál sira nu'udar opsauun atu hadi'a ka melora liutan gastu sira kada tinan hodi fó prioridade ba área produtivu sira ne'ebé bele hametin sustentabilidade reseita estadu nian iha tinan sira tuir mai.

Semináriu ne'e organiza husi Komisaun C, Parlamentu Nasionál ho Ministériu Finansas durante loron rua hahu husi 4-5/11/2020 antes tama audénsia públika ho instituisaun estadu sira kona-ba proposta Orsamentu Jerál Estadu ba tinan 2020 iha 06 Novembru 2020.

Iha intervensaun Vise-Ministra Finansa introduz kona-ba Panorama orsamentál 2021 iha Livru 1 nian ne'ebé deskreve de'it kona-ba Estratéjia Orsamentu Jerál Governu nian, no fó mós informasaun kona-ba previzaun panorama ekonómiku internasionál no doméstika inklui estimasaun ba reseita doméstika no reseitas sira husi fundu petróleu nian.

Iha parte seluk, iha livru panorama orsamentál ne'e mós haree ba rendimentu sustentável estimativas nu'une'e mós haree ba despeza jerál iha mediu prazu inklui mós iniciativa prinsipál foun sira ba tinan sira tuir mai.

Ministru Koordinador Asuntu Ekonomia ko'alia kona-ba planu rekuperasaun ekonómika. Ministru ne'e hateten katak planu rekuperasaun ekonómika haree ba aspeitu 6 ne'ebé tuir nia importante mak hanesan Área Agrikultura, Edukasaun, Saúde, Protesaun Sosiál, Turizmu no Fortalesementu institusionál.

Tuir nia planu ne'e sei hahu investe iha orsamentu tinan 2021 no ida ne'e nu'udar asaun konkoreta ba Governu atu halo hodi hadi'a ekonomia rai laran hodi nune'e bele hadi'a di'ak liutan ekonomia Timor-Leste nian ne'ebé monu ba -6% afeita husi pandemia covid-19 nian. Nia haktuir tan katak tanba mundu la iha previzaun tempu ba moras pandemia ida ne'e ho nune'e Governu hola iniciativa atu halo investmentu iha área estratéjiku hirak ne'e ba médiu no longu prazu nian.

Iha panorama orsamentál nian prevee planu rekuperasaun ekonomia ne'ebé efetadu durante pandemia Covid-19 hodi sai minus -6% no tanba ne'e iha tinan 2021 Governu iha planu orsamentál sei foka liu ba investimentu iha rai laran hodi hasa'e produsaun iha Agrikultura, hadi'a hodi promove setór turizmu, hadi'a qualidade no facilidade eduksaun, hadi'a qualidade tratamentu saude no reforma instituisiónal hodi hametin administrasaun estadu ne'ebé kredível no fasil atu asesu.

Iha intevensaun husi representante Banku Mundiál, Embaixadór Uniaun Europeia no representante ADB konsidera planu rekuperasaun ekonomia ne'ebé Governu elabora importante no ida ne'e nu'udar meu ida atu oinsa bele buka rekupera ekonomia Timor-Leste nian ne'ebé monu iha tempu pandemia covid-19.

Iha intervensaun Vise-Prezidente Banku Sentrál Timor-Leste nian haktuir katak nia parte sempre husu ba Governu atu disiplina iha gastu hodi oinsa bele fõefeitu ne'ebé di'ak ba hadi'a ekonomia povu no ba dezvoltamentu ne'ebé di'ak ba moris povu nian.

Orsamentu ne'ebé gastu ona tinan 10 resin nia rezultadu sai mós referensia ba iha Timor Leste hodi oinsa bele hadia ho diak liutan nian planu dezvoltamentu no haree investimentu estrateziku sira hodi evita Timor-Leste dependensia ba fundu minarai tanba dadaun ne'e tuir Vise-Prezidente Banku Sentral Timor-Leste durante ne'e dependensia tebes ba fundu mina rai no dalan úniku ne'ebé sai problema no preokupasaun públiku durante ne'e mak oinsa bele kria ka buka fontes reseitas husi parte seluk hodi sustenta ekonomia Timor-Leste iha futuru.

Nia haktuir katak iha krize mundiál liga ho pandemia ne'e nu'udar oportunidade atu kria reseitas alternativa la'ós husi petróleu no tanba ne'e haree liu ba setór produtivu sira iha área agrikultura nian no sira seluktan ne'ebé pontensial hodi hadi'a no fó rendimentu ba Estadu no povu, Governu bele hola iniciativa atu halo investimentu iha área ka setór sira ne'e.

## **Konkluzau no rekomendasaun**

Parlamentu Nasionál kontinua funksiona ho di'ak iha fulan Novembru nia laran hodi halo audénsia ho entidade estadu relevante sira kona-ba OJE 2021. Dezentendimentu polítika entre bankada sira ne'ebé kaer ukun no bankada partidu opozisaun CNRT kontinua sai hanesan dezafiu boot ba funksionamentu no efektividade serbisu Parlamentu Nasionál nian.

Aleinde ne'e, Komisaun A mós halo audénsia públiku iha nível munisipál ba ezbosu Lei Podér Lokál no Desentralizasaun Administrativa no Lei Eleitoral Munisipál. Ezbosu lei sira ne'e hakerek ho lian Portugés ne'ebé autoridade lokál sira susar atu kompriende no la halo distribuisaun antes.

Nune'e, JSMP rekomenda atu Parlamentu Nasionál atu tau interese povu no nasaun nian aas liu duke interese partidária atu bankada parlamentár hothotu bele kontribui ba funksionamentu normal no efetiva Parlamentu nian. Nune'e, Parlamentu Nasionál iha sesaun lejizlativa ida ne'e bele konsentra ba diskute no aprova lei importante sira ne'ebé pendente hela.

Enkuntu kona-ba ezbosu lei sira, JSMP rekomenda atu halo tradusaun ba lian ofisiál Tetun atu públiku bele asesu ho di'ak no halo distribuisaun antes ba audénsia sira molok halo audénsia, nune'e bele iha partisipasaun ne'ebé di'ak no másimu.